

求
書

唐賈耽記邊州人四夷道里考實

一

唐賈耽記邊州入四夷道里考實敘

唐書藝文志有賈耽皇華四達記二十卷其書佚不傳其文見于地理志卷末謂從邊州入四夷境凡通譯于鴻臚者畢紀之其入四夷之路與關戍走集最要者七
一曰營州入安東道二曰登州海行入高麗渤海道三
曰夏州塞外通大同雲中道四曰中受降城入回鶻道
五曰安西入西域道六曰安南通天竺道七曰廣州通
海夷道蓋唐置羈縻諸州皆傍塞外或寓名夷落四夷
通中國者東西朔南罔弗暨賈記者方域道里之數備
矣而繇唐迄今千餘年郡縣沿革關戍更置山川島嶼

名稱殊異環球大通機巧日出懷遠之道寢失寇攘之禍益烈於是使車之所經師旅之所出中外人士游歷之所記述尋按圖籍視萬里若指掌昔略而今詳昔約舉而今實驗其度越前人亦時勢爲之哉祁甫吳先生攷證賈記之說爲巨篇五曰營州入安東道曰登州海行入高麗渤海道曰安南至永昌曰諸葛亮城至摩揭陀國兩路曰驩州至環王國水陸眞臘羅越其曰考實者用江慎修氏春秋地理考實例也吳補松丈蒐輯先生遺文整比累月成茲五篇五篇之文涉高麗者二涉安南者二涉緬甸者一以意逆志其殆剗心邊事有爲

而作者歟同治以來內甯外撫國家交鄰有道務息
事甯人而蹈瑕抵隙日踵至勘界訂約之使不絕於道
自滇邊失險驃國馴象不復至甲申之役戰勝而要盟
甲午之役海軍燬焉昔所臣服舉淪于敵朝貢絕地落
空矣先生雖冷宦而心繫君國研窮戰守之術言戰守
必資地形海陸道里遠近夷嶮靡弗究閱覽乙部句稽
經緯度里之表靡弗詳旁徵曲引累數千言不休蓋恫
心於桑土之未徹地利之不如人和發憤著書託之空
文不自知其繁猥而無紀極也嗚呼唐之興也際天所
覆悉主悉臣有弗帥者蹙牙聲庭卒帖耳服貞觀之季

天子自將屬囊鑣度遼碣高麗傾國來一麾而破之號
駐蹕之山圖破陣之狀勒石紀功全師而還何其盛也
然而拓地廣務遠忽近日中必焚禍機蘖芽天寶以後
區宇崩墜更二百年陵夷以逮于亡視史官所謂內先
自治釋四夷爲外懼者何其逖歟嗚呼後之視今猶今
視昔讀先生是書則有橫覽八表怔營旁徨爲之揜卷
長太息者矣辛酉霜降節吳興劉承幹序於西湖留餘
草堂

唐賈耽記邊州入四夷道里考實卷一 求恕齋叢書

錢塘吳承志纂

吳興劉承幹校

營州入安東道地里考實

營州西北百里曰松陁嶺其西奚其東契丹距營州北
四百里至湟水營州東百八十里至燕郡城又經汝羅
守捉渡遼水至安東都護府五百里故漢襄平城也東
南至平壤城八百里西南至都里海口六百里至建安
城三百里故中郭縣也南至鴨綠江北泊汊城七百里
故安平縣也自都護府東北經古蓋牟新城又經渤海

長嶺府千五百里至渤海王城臨忽汗海其西南三十里有古肅慎城其北經德里鎮至南黑水靺鞨千里蒙按營州今直隸朝陽縣治本志河北道下云營州柳城郡上都督府本遼西郡萬歲通天初爲契丹所陷聖歷二年僞治漁陽開元五年又還治柳城天寶八年更名縣一柳城柳城卽朝陽漢書地理有柳城屬遼西郡崔鴻十六國春秋前燕錄云慕容皝以柳城之北龍山之南福德之地也使陽裕築龍城構宮廟改柳城爲龍城縣九年遷都龍城十二年號新宮曰和龍宮魏書地形志云營州治和龍城大延二年爲鎮眞君五年改置

領昌黎郡治龍城縣八年併龍城屬焉依兩說今城爲
慕容燕元魏之龍城隋書地理志云遼西郡舊置營州
開皇初置總管府改龍城縣爲龍山八年改爲柳城大
業初府廢置郡柳城名始於隋漢故柳城在南樂史太
平寰宇記營州下云柳城縣漢柳城地與城有別而
故城所在不詳本志平州下云有柳城軍永泰元年置
平州治盧龍爲今盧龍縣其地近漁陽營州於契丹陷
後僑治彼郡柳城或亦分寄此縣顧氏炎武日知錄云
唐時柳城之地屢被陷沒移徙無常軍名應從之出徐
夢莘三朝北盟會編載許亢宗宣和奉使行程錄云自

望都縣六十里至營州營州古柳城乃殷之孤竹國漢
唐遼西地柳城據軍言兼據舊所移治之縣而言營州
爲遼置治廣甯今昌黎縣新五代史四夷附錄契丹附
錄云唐末幽薊割據戍兵廢散契丹因得出陷平營故
營州與此軍先後同爲所陷遼史地理志中京道興中
府下云本漢柳城縣地唐營州都督府後爲奚所據太
祖平奚乃完葺柳城號霸州彰武軍重熙十年升興中
府南京道營州下亦綴本漢柳城縣地唐營州都督府
云云詳興中府下後爲奚所據之說似故州於入契丹
以前已棄爲奚地州治復移平州故宣和奉使行程錄

竟以遼所置新州當古柳城蔡沈書集傳禹貢九州及
今州郡圖綴列營州於榆關東所據亦唐末之迹李賢
明一統志永平府下云昌黎縣本營州地隋開皇初置
營州大業初罷州置遼西郡唐初復爲營州緣此衍誤
興中府實唐舊州元史地理志作興中州明改爲營州
衛後廢入泰甯衛胡宗憲籌海圖編義州衛圖尙列此
城標目爲興中路乾隆一統志承德府古蹟下云興中
故城卽朝陽縣治慕容燕之國都魏之營州昌黎郡隋
之營州遼西郡唐之營州柳城郡皆在其地說至明析
外藩蒙古土默特古蹟柳城故城下又增入漢志之文

漢故城去縣里數雖不可考杜佑通典州郡門有扶黎故城云在柳城縣東南歐陽忞輿地廣記作交黎交黎亦漢縣後改爲扶黎其故城在唐柳城東南漢故柳城必在其西北與唐縣相差當不甚遠錢氏站漢志新斟注從熱河志說云在今錦州府甯遠州西南今平山營城是其地柳城在平山營交黎不能更在其東南應闕所疑興中廢後其城從土俗名爲固爾班蘇爾巴罕乾隆三十九年始置三座塔廳齊氏召南水道提綱云大凌河東北至古興中城之南時廳尙未置從舊名稱興中改縣在四十三年縣去府治七十三里地段詳具

李氏調元出口程記李氏兆洛壹統輿地圖縣在京師偏東四度二十五分赤道北四十一度五十五分胡文忠中外壹統輿圖經徑差西一分緯徑依所界百里方徑校合亦差南十分法蘭西國教士蔡尙質直省地輿全圖經徑又差西四分兩壹統圖並出內府本直省地輿圖識亦云本舊教士潘如雷孝思杜德美麥大成等原稿而準點各不相同丁氏取忠輿地經緯度里表朝陽在北四十一度四十五分偏東四度二十二分於三圖復無一合日本國人原田信翰十九省及韓國全圖經度用英吉利國倫敦徑增多中線一百十六度

二十八分四十八秒朝陽在英東一百二十度二十分較直省地輿圖又差西二十分四十八秒緯徑同輿地經緯度里表 內府本尊藏中祕不可得見諸圖得失未敢輒定壹統輿地圖後識云原圖依 內府以天度經緯分劃在天一度當地上二百里二百爲飛鳥直徑人行徑有曲折數不止此黃氏國瑾中俄交界圖加作二百五十差較爲五分之一鄒氏伯奇學計一得謂續漢書郡國志中山國與長沙國南北相距里數較今定州與長沙府兩處北極出地差距十度之直徑增多二分之一續志所云爲漢里短今里十分之三學計一得

所據爲改合營造尺之里數贏出今里百分之四整齊
兩率差數又近三分之一辭氏培榕朝鮮輿地說云朝
鮮道里綿亘胥遵驛路紆道而牽算之東北起自穩城
邑遷迤至王都而南至海南邑計程三千一百八十餘
里下引美利堅國人林樂知說其地距十度十度古曲
折徑三千一百八十餘里其較復爲八分加三壹統輿
地圖朝鮮穩城不標入注所界圖們江曲在 京師偏
東十二度四十五分赤道北四十三度二分海南在偏
東七度五十八分北三十四度三十分距徑用緯尺斜
較爲九度加經徑差狹自十三分遞減至七分和作十

分之數入四十七分八十四秒減林樂知所云十二分
十六秒每度應得三百二十四里又十分里之四較上
數更贏此徑距府方位絜同經尺乃占至兩度五十五
分府位在 京師偏東一度四十分赤道北四十一度
十五分減緯經差數九分七十五秒實兩度四十五分
二十五秒一度僅得二百六十五里又二十分之一有
奇短彼數五十有九微縮中外壹統輿圖府位又差西
十分南七分五十秒距徑爲兩度五十七分五十秒復
增多壹統輿地圖本數二分五十秒緯較差長十分之
半減實贏二分八十七秒有奇度所占數又減短四里

半微縮直省地輿圖差闕更多府位偏在二十八分緯
徑迤北在二十七分距徑兩度五十四分減三分三秒
爲五十一分九十七秒占數惟二百五十四里又六分
里之四差縮遞減至六十九里半有奇黃氏棟材游歷
芻言云西人地圖亞山東北境距江卡巴塘直徑二度
約五六百里而近五六百里卽謂三分加一至五分加
一兩等差數孰爲近合亦未有分說江卡巴塘去亞山
東北境里數實不止六百游歷芻言已疑圖誤十九省
及韓國圖府位在英東一百十八度赤道北四十一度
五分與中外壹統輿圖差不甚多距徑止占經尺兩度

二十八分減緯差實兩度十七分三十三秒一度得三百十八里又十五分里之十四有奇成數可爲三百十九於朝鮮輿地說所云相近此徑似足爲據而以下去義州遼陽州方位度數分數又復差至過半則亦襍取各圖非有衡準諸圖旣難整齊歸一以下道里有確鑿記載之文可憑者不復繁撫無可憑之文及有其文而歧出不能憑定者始資引爲證以存厓略西北百里曰松陁嶺其西奚其東契丹松陁名無別見顧氏祖禹讀史方輿紀要引五代舊史云契丹地北界松陁今本舊史外國傳契丹傳無此文未詳所據松陁爲北界亦非